

<b>W3-4</b>	<b>Asignatura</b>	Filipino sa Piling Larang - Akademik	<b>Baitang</b>	12
	<b>Markahan</b>	4	<b>Petsa</b>	

### IV. YUGTO NG PAGKATUTO AT GAWAING PAMPAGKATUTO

#### A. Panimula (Mungkahing Oras: 30 Minuto)

Isang aralin na naman ang ating napagtagumpayan. Noong ikalawang linggo ay finalakay natin ang katitikan ng pulong. Ngayong ikatlong linggo naman ay dadako tayo sa ating panibagong aralin.

Pamilyar ka ba sa "panukalang proyekto?" May ideya ka ba kung para saan ito at ano ang mga katangian nito? Halina't atin nang tuklasin ang ating bagong paksang aralin.

Ang panukalang proyekto ay karaniwang gawain ng mga taong nanunungkulan sa gobyerno o pribadong kompanya na naghahain ng bagong programa na may layuning magbigay ng dagdag na kita, trabaho, kaayus sa komunidad, at iba pa.

Nakasalalay sa konteksto ng institusyong paghahainan ng panukala ang magiging ispesipikong anyo ng isang panukalang proyekto.

Tatalakayin sa modyul na ito ang mga pangunahing katangian at impormasyon na karaniwang kinakailangan sa pagsulat ng isang panukalang proyekto.

#### B. Pagpapaunlad (Mungkahing Oras: 240 Minuto)

Ang **Panukalang Proyekto** ay uri ng dokumento na kadalasang ginagamit para maipaliwanag at kumbinsihin ang namumuhunan o *sponsor*. Ang mga pakay ng proyekto na ito ay kadalasang solusyon para sa mga iba't ibang oportunidad o problema ng ating bayan. Mahalaga ang mainam na pagsulat ng panukalang proyekto dahil dito binabase ang ideya na minsan ay umaabot sa milyon-milyong salapi.

Sa pagsulat ng panukalang proyekto, kailangang bigyang-pansin ang sumusunod na mga tanong:

1. Ano ang nais mong maging proyekto?
2. Ano ang mga layunin mo sa panukalang proyekto?
3. Kailan at saan mo ito dapat isagawa?
4. Paano mo ito isasagawa?
5. Gaano katagal mo itong gagawin?
6. May sapat bang puhunan o kapital para sa proyekto?

Mahalagang matutuhan ng mag-aaral ang ganitong uri ng akademikong sulatin upang malinang ang kasanayang mag-isip, magmungkahi, masusing magsiyasat, at magpasiya o bumuo ng desisyon.

#### Mga Katangian

Mahalaga na maging makatotohanan ang panukalang proyekto dahil kung ang panustos mo ay hindi umaayon sa kinakailangang salaping igugugol para sa proyekto ay hindi ito maaaring payagan o sang-ayunan. Maaaring magdulot ito ng maling pag-iisip para sa iba o maging sanhi pa ng pagkawala ng tiwala sa nagpanukala. Kung ang ihahain mong panukala ay tumutugon sa mabuting kapakanan ng lahat, tiyak na agaran itong sasang-ayunan. Kung maaari, tiyaking naisasaalang-alang ng panukalang proyekto ang kabutihan ng lahat, hindi lamang pansarili o ng iilang tao.

Hindi maligoy at kagyat ang paglalahad ng mga detalye tiulad ng kahalagahan, katangian, at iba pang mga datos para sa panukalang proyekto ang nilalaman ng ganitong uri ng sulatin. Naisasagawa ito sa pamamagitan

ng direktang pagdedetalye ng mga kinakailangang bagay sa proyekto at direkta ring paliwanag sa proseso ng pagsasagawa ng proyekto.

### Mga Bahagi ng Panukalang Proyekto

Nahahati sa tatlong bahagi ang panukalang proyekto. Sa unang bahagi ay ang finatawag na panimula, isinasaad dito ang rasyonal—ang katwiran hinggil sa suliranin at layunin ng proyekto. Ikalawang bahagi ay ang katawan. Dito ay isa-isang ipinapaliwanag ang mga kailangang gawin at iminumungkahing badyet para sa proyekto. Ang panghuli ay ang kongklusyon na naglalahad ng mga benepisyong maaaring idulot ng proyekto. Maaari din na maging bahagi ng kongklusyon ang anumang rekomendasyon na maibibigay para sa mga susunod pang proyekto.

Matapos isulat ang panukalang proyekto, huwag kaliimutan na nararapat na maglakip ng liham na humihiling ng pagsang-ayon. Ito ay sa kadahilanang kinakailangan ng kasulatan sa pagpapatibay para sa kautusang pagpapatupad ng proyekto o kontrata.

Narito ang halimbawa ng Panukalang Proyekto na nagmula sa <https://www.panitikan.com.ph/panukalang-proyekto-halimbawa-kahulugan-katangian-layunin-pagsulat>.

**I. Pamagat:** PANUKALANG PROYECTO SA PAGKAKAROON NG PANGKAT PARA SA CAMPUS JOURNALISM SA SAN JOSE HIGH SCHOOL

**II. Proponent ng Proyekto:** Mark Edison Julian, Jenalyn Alonzo

### III. Kategorya:

Ang proyektong pagbuo ng pangkat para sa Campus Journalism sa San Jose High School (SJHS) ay isasagawa sa pamamagitan ng pagpupulong sa mga guro sa English at Filipino at pagbuo ng plano upang mahikayat ang mga mag-aaral na sumali sa nasabing pangkat.

IV. Petsa ng Bawat Hakbang:

PETSA	MGA GAWAIN	LUGAR/LOKASYON
Agosto 19, 2019	Pagpupulong ng student council officers (Julian at Alonzo) kasama ang mga guro sa English at Filipino na magsisilbing school paper advisers	Room 202 / TLE Laboratory
Agosto 20, 2019	Pagtatalaga ng mga guro na magiging punong abala sa paghikayat sa mga mag-aaral/ pagpapalano ng gagawing campaign sa buong eskwelahan	Room 202 / TLE Laboratory
Agosto 21, 2019	Pagsasagawa ng campaign sa buong SJSH upang makahikayat ng mga gustong sumali/ pagpapatala sa mga nais magpamiyembro	SJHS
Agosto 22, 2019	Pagpupulong kasama ang mga nagpalista at pagbibigay sa kanila ng kaalaman kung ano ang dapat malaman tungkol sa Campus Journalism/ Paghahalal ng mga magiging officers ng club o organization	SJSH Library/ Covered Court

### V. Rasyonal

Ang kahalagahan ng proyektong ito ay magbibigay ng kaalaman sa mga mag-aaral ng kahalagahan ng pamamahayag at magbubukas ng bagong kaalaman para sa mga mag-aaral.

### VI. Deskripsyon ng Proyekto

Ang proyektong ito ay aabutin ng limang buwan bago maisakatuparan o makompleto. Maliban sa pagbuo ng grupo, gagawa rin ang mga ito ng newsletter at sasali sa ilang patimpalak.

### VII. Badyet

Kahati sa badyet ng student council ang magiging campus journalism group. Magbibigay rin ang paaralan ng pondo sa mga patimpalak na gagawin sapagkat isa ito sa mandato ng paaralan.

